

**MBM Sokong Saranan Perdana Menteri Berhubung Fungsi Asean Kepada Belia Bernama
5 April, 2012**

KUALA LUMPUR, 5 April (Bernama) -- Majlis Belia Malaysia (MBM) menyokong penuh saranan Perdana Menteri Datuk Seri Najib Tun Razak berhubung fungsi dan pergerakan Asean yang seharusnya perlu lebih dekat serta mampu mengupayakan peranan dan pembangunan belia di rantau ini.

Presiden MBM Mohamed Maliki Mohamed Rapiee berkata saranan itu perlu menjadi landasan kepada setiap sektor dalam masyarakat terutama agensi kerajaan dalam merealisasikan.

Beliau berkata pernyataan itu lahir daripada pengamatan Perdana Menteri terhadap peningkatan penglibatan belia di seluruh dunia dalam menentukan masa depan sesebuah negara serantau dan dunia.

"Pengalaman belia dalam program pembangunan serta penglibatan mereka dalam menentukan dasar dan hala tuju negara merupakan pengalaman berguna yang perlu ditingkatkan.

"Golongan belia hari ini mahukan suara, pandangan dan aspirasi mereka diambil kira di dalam pembentukan dasar sesebuah negara, program pembangunan, penyertaan di peringkat antarabangsa dan kepercayaan terhadap tanggungjawab yang diberikan, selain ia juga merupakan satu praktis masyarakat untuk mendekati golongan itu," katanya dalam satu kenyataan Khamis.

Mohamed Maliki mengulas uaputama Najib pada forum 'Leadership Challenges in Asean: Meeting Tomorrow's Needs and Expectations' semasa menghadiri Sidang Kemuncak Asean ke-20 di Kemboja semalam.

Beliau berkata MBM percaya golongan belia mampu menerajui negara berdasarkan kreativiti dan potensi mereka, selain perlu mendominasi ruang media elektronik serta cetak melalui penonjolan kejayaan dan hasil kerja mereka secara individu atau berkumpulan.

Perkara itu penting bagi tujuan membangkitkan wacana sihat dalam masyarakat terhadap keupayaan belia selain memberi gambaran positif mengenai peranan belia dalam masyarakat.

"Fungsi pergerakan belia kini perlu berganjak kepada perkara yang bersifat global kerana ia merupakan suatu elemen dalam usaha melatih dan membina ciri kepimpinan mereka.

"Penglibatan belia dalam isu bersifat global dan universal seperti keamanan, demokrasi, pendidikan, alam sekitar dan sebagainya, mampu memberi anjakan paradigma kepada mereka agar setanding dengan belia di negara maju," katanya.

Selain menjadikan peringkat pengajian tinggi medan terbaik golongan belia menyemai kesedaran terhadap isu global dan hubungan antarabangsa, beliau menggalakkan mereka menyokong wacana serta kempen kesedaran berkaitan isu itu.

Mohamed Maliki juga berkata saranan itu dapat dijayakan melalui kesediaan segenap lapisan masyarakat yang memberikan ruang, peluang dan kemudahan kepada golongan belia untuk menerokai dunia sebagai persediaan bergelar pemimpin.

"Sektor awam dan swasta memerlukan penglibatan belia, khususnya dalam program antarabangsa, sebagai satu nilai tambah kepada pembangunan sendiri dan kreativiti kakitangan mereka.

"Di samping itu, Asean turut mempunyai agenda serantau yang memerlukan sokongan golongan itu sepertimana yang terkandung di dalam matlamat pembinaan Komuniti Asean 2015," katanya.

---BERNAMA

Hakcipta © 2012 BERNAMA

Source: <http://www.bernama.com/bernama/v6/bm/newsindex.php?id=657388>